

quamvis enim sit fuga, non tam id habet ex affectus modo, quam ex modo objecti, quia nimurum præcipua ratio ejus est appetere separationem, quod fieri solet fugiendo. An vero desiderare malum alteri possit sub alia ratione ad alias passiones pertinere infra dicemus. Quod vero D. Thomas, 1, 2, quest. 46, art. 2, ad 6, ait hanc voluntatem pertinere ad odium, vel causaliter tantum intelligentem est, vel si intelligitur formaliter, ut ipse indicat, non satis intelligo quid sibi velit, et multo minus, quod Cajetanus commentatur, nam ponit hanc fugam et desiderium in quibusdam actibus simplicibus, amorem vero et odium in quadam complexione, quia dum amo, volo bonum alteri, dum odio habeo, volo malum, nam potius videtur mihi contrario modo dicendum esse, ut ex dictis patet.

6. *Tertia assertio.* — Dicendum tertio, tristitiam esse actum appetitus voluptati contrarium, unde est amaritudo quedam vitalis, quæ ex praesentia mali, quod odio habetur et vitari nequit, resultat: ut patet ex dictis supra de voluptate: nam contrariorum eadem est ratio, unde quidquid de effectibus et causis passionis hujus dici potest, ex his quæ diximus de passione contraria elicenda sunt. Sed dicet aliquis, delectatio non requirit ex parte objecti quod vitari, vel non vitari possit: ergo nec tristitia. Respondet negando consequentiam, nam tristitia oportet esse voluntatem de objecto involuntario: si autem esset in potestate alicujus malum depellere, et non faceret, non esset involuntarium, et sic non afferret tristitiam.

7. *Notatio una pro doloris passione.* — Advertendum vero primo est dolorem ad hanc passionem revocari, nam etiam sequitur ex praesentia mali: differt tamen a tristitia juxta usitatam terminorum significationem, nam dolor est ex laesione corporis, quæ exteriori sensu percipitur: tristitia vero ex malo interiori tantum appreheenso, quæ hominis censetur propria, quia solus homo potest interno sensu apprehendere conveniens, vel disconveniens absque ordine ad externum sensum, et ideo D. Thomas, 1, 2, q. 35, art. 2, ait tristitiam comparari ad dolorem sicut gaudium ad voluptatem: et art. 7, vocat illam dolorem internum, videaturque, quest. eadem 35, a. 1, ad 11; de dolore vero multa dici possunt, quæ philosophis remitto, et videri possunt in tractatu de Anima, sect. 1.

8. *Notatio de divisione tristitiae.* — Advertendum secundo est tristitiam a Damasceno,

libr. 2, et Gregorio Nysseno, libr. 4, c. 12, D. Thoma, 1, 2, q. 35, art. 6, dividi in misericordiam, invidiam, anxietatem, accidiam; potest enim esse tristitia de malo proprio, vel alieno, aut etiam de alieno bono: de proprio enim bono, ut sie, nullus tristatur. Tristitia de alieno malo vocatur misericordia, in qua quis, ut ait D. Thomas, apprehendit malum, ut proprium: tristitia de proprio malo, si communis sit, retinet nomen tristitiae, et si nimium affligit animam, vocatur anxietas; si vero tanta sit, ut etiam corpori torporem injiciat, et membrorum usum impedit, vocatur accidia, quamvis hoc nomen alias significet peculiare vitium charitatis contrarium, 2, 2, quest. 36, jam vero tristitia cum non sit de bono, ut bonum est, in quovis illud sit, si bonum alterius, ut malum proprium apprehendatur, tristitiam afferit, et illa vocatur generaliter invidia, quamvis magis proprie tune censematur invidia, quando ratio mali ex bono alterius nulla alia apprehenditur, nisi diminutio propria excellentiae, de quo D. Thomas, 2, 2, q. 35, unde intelligitur hos actus magis proprie in voluntate quam in appetitu sensitivo reperiri. Quare alia, præter haec vulgata genera, numerari hic possunt penitentia, zelus, æmulatio, nemesis, quæ D. Thomas ad predictam divisionem reducit.

9. *Notatio tertia de causis et effectibus passionum quæ circa malum versantur.* — *Notatio quarta de remediiis tristitiae.* — Tertio advertendum est causas effectusque harum passionum quæ in malo versantur, ex effectibus et causis contrariorum effectuum colligi debere, nam per se contrariorum contrarie sunt causæ et effectus, quod D. Thomas 1, 2, 37, late explicat, ubi tandem concludit nullam passionem magis nocere corpori, quam tristitiam, Proverb. 17: *Spiritu tristis exsiccat ossa*, unde a Latinis haec passio vocatur *ægritudo*, tametsi cum moderata est, et rationi consentanea, utilis sit et necessaria. Isaiae 16: *In tribulationem murmuris doctrina tua eis*, 2, ad Corint. 7: *Tristitia, que secundum Deum est*. Quarto advertendum est de remediiis contra tristitiam agere D. Thomam, 1, 2, quest. 38, quæ duplia esse possunt, alia quæ delectationem excitant, de quibus ipse copiose disserit, alia quæ apprehensionem ipsius mali minuant, de quibus videri potest Cicero, Tuscul. 9.

## SECTIO VIII.

*Quid sit spes, et quod habeat contrarium.*

1. *Spem esse in intellectu quidam putarunt.*

— Hactenus de passionibus concupiscentiae disputavimus, sequitur, ut de his quæ irascibili D. Thomas tribuit, disseramus, e quibus spes prima est. Dixerunt vero quidam non esse spem actum appetitus, sed cognitionis judicium, illud nempe quo quis sibi persuadet se posse consequi, vel fore, ut consequatur bonum quod amat, tametsi difficile appareat, quæ sententia falsa est, ut in materia de spe, disp. 1, sect. 2, et lib. 2, de Grat., c. 12, latius contra Lutheranos diximus, qui spem cum fide confundunt: illud quidem judicium necessarium est ad sperandum, et ideo quando quis titubando desperat, præcipue quidem conatur cum illo judicio stabilire, quia ab eo spes oritur, non tamen potest in illo formaliter consistere, cum spes tendat in bonum sub ratione boni, quod potentia est appetitiva, non cognoscitiva. Dices versari circa bonum judicando illud posse obtineri; sed contra, quia non omnis, qui ita judicat, sperat: potest siquidem nullum adhibere conatum ad bonum illud consequendum, et fidelis servata fide potest desperare. Item vix alias possent in supernaturalibus fides et spes distingui: tandem timor est in appetitu: ergo et contraria spes; nam sicut ille est de imminentia malo, ita spes de bono.

2. *Tria certa pronuntiata de spe.* — *D. Thomas placitum de distinctione spei et desiderii.*

— Dico ergo quæ ex dictis certa colligi possunt. Primo spem esse actum appetitus prosequentis bonum. Secundo bonum illud, esse bonum absens et arduum, nam quæ aliquis possidet, non sperat, et quæ sine difficultate, et dubitatione obtinenda credimus, moraliter tanquam jam obtenta reputamus. Tertio certum est idem, ab amore et gaudio distingui, quia amor per se non versatur circa absentia, ut agendo de fruitione diximus. Difficultas ergo superest, quomodo spes a desiderio differat, uterque enim actus in bonum absens tenet. D. Thomas inquit differre, quia spes tendit ad bonum arduum, desiderium autem in bonum absolute, seu carens arduitate: quam objectorum diversitatem in appetitus inferiori vult sanctus Thomas sufficere ad distinguendos non solum actus, sed etiam potentias: in voluntate vero ad distinguendos saltem diversos actus. Ratio esse potest, quia constat deside-

rium et spem esse actus diversos; tum quia contingit vehementer et desiderare aliquid sine spe obtainendi; tum quia habent contraria distincta, scilicet desperationem boni et fugam mali: ergo eorum distinctio est ex objectis, in quibus nulla diversitas ostendi potest.

3. *Nihilominus Scotus*, in 3, distinct. 26, Gabriel, et alii ibi, Magister, tractatu 2, Moralium, capite septimo, negant hos actus esse distinctos, et spem tribuunt appetitui, vel etiam voluntati, ut rationem habet concupiscentialis. Probatur, nam spes est motus in bonum consequendum ut sie: ergo appetitus fertur hoc motu per modum concupiscentiae; ergo desiderando. Secundo, quia hi actus solum differunt sicut desiderium boni ardui, et non ardui, quæ differentia est accidentalis, sicut desiderare moderatas divitias quæ facile haberi possunt, vel magnas, quæ difficile comparantur, ut enim objecta haec accidentaliter differunt, sic et actus. Tertio bonum arduum non speratur nisi prius ametur, nam, ut D. Thomas ait, passiones irascibilis oriuntur ex concupiscentibus, ut per se notum est: sed amor boni et amor boni ardui non distinguuntur: ergo. Dices amorem nunquam versari circa arduum, ut sic, quia fertur simpliciter in bonitatem objecti, sine ordine ad consecutionem, in qua tota difficultas boni amati consistere potest. Sed hoc imprimis non est omnino certum, quia nihil videtur obstare, quoniam aliquod bonum per se reputetur excellens, superansque conditionem appetitus: sed ut demus illud in amore: in desiderio tamen locum non habet, quia hic actus revera versatur circa bonum absens, et consecutionem, ut supra dixi, agendo de actu intentionis. Sicut ergo potest quis intendere bonum absens et arduum, ita desiderare: ergo desiderium versari potest circa bonum arduum ut sic: ergo non differt ab spe. Confirmatur, quia nullus sperat, qui non efficaciter desideret bonum arduum quod sperat, siquidem nullus sperat nisi quod intendit consequi, quod est efficaciter desiderare: ergo. Favet etiam huic sententiae axioma illud: *Non esse multiplicandos actus sine necessitate*, item favet, quod supra diximus et latius, in libris de Anima, concupiscentiale et irascibile non esse distinctas potentias, ac quod agentes de actibus voluntatis, statuimus, intentionem et desiderium, et similes actus ad genus idem pertinere.

4. *Quartum pronuntiatum.* — Dicendum quarto spem differre a desiderio, vel solum

accidentaliter, vel solum ut superius ab inferiori, prout *desiderii* vox variis modis usurpari potest, interdum enim *desiderium*, ut supra etiam de actibus voluntatis diximus, quamcumque appetitionem boni absentis significat, sive illa efficax sit, sive inefficax, et hoc modo differt ab spe, ut quid generalius. Nam spes significat actum efficacem et absolutum: neque tamen omne desiderium efficax habet rationem spei, sed illud, quod in re aliquo modo difficili versatur; et hoc modo differt spes a desiderio boni non ardui per se loquendo solum accidentaliter ex materialibus objectis, ut ex dictis patet, et ex dicendis de audacia latius constabit.

5. *Ultima opinio de natura spei refellitur.* — Neque vero probabile est, quod quidam dicunt, spem esse passionem quamdam necessarium resultantem ex persuasione, et desiderio boni futuri ardui, et obtinendi: primo enim haec persuasio non est necessaria ad spem, sed est satis existimare posse consequi tale bonum: deinde ex hoc iudicio non necessario sequitur spes, nisi adsit desiderium absolutum et efficax, quo posito non potest exponi quid sit id, quod sequitur, vel quam vim habeat in appetitu. Dices esse veluti erectionm quamdam, et extensionem appetitus timori contrarium, et speciale affectum, quo quis confidit se consecutur quod amat. Sed re vera tota haec erectio, quantum ad appetitum spectat, consistit in intentione illa efficaci et absoluta prosequendi bonum amatum, non obstante difficultate ejus: reliqua vero pertinent manifeste ad persuasionem et iudicium: nam, his duabus positis, nihil aliud necessarium est ad omnia quae in hoc effectu experimur: imo neque aliud videtur posse concipi. Quocirca quamvis spes sit actus appetitus, connotat tamen iudicium illud quod proprie *confidentia* nominatur, et quamvis desiderium per se ærumnam potius, quam gaudium afferat, tamen desiderium cum illa existimatione affert gaudium, et dicit ad operationem, juxta illud 1, Corinth., 9, *debet qui arat spe arare*: propter hoc etiam dicimus magis nos sperare in alio, quam desiderare, tunc enim speramus in alio quando et desideramus aliquid habere ab illo, et judicamus fore ut consequamur. Neque contra hoc videntur urgere in contrarium adducta in n. 2, potest enim aliquis desiderare inefficaciter, seu per velleitatem, desperando, non tamen desiderium efficax potest consistere cum desperatione, de qua quid sit statim dicemus, in numero 7.

6. *Primum corollarium.* — *Secundum corollarium.* — Ex dictis primo colligitur, quae sint causæ et effectus spei, cum enim hic actus duo requirat, scilicet, objectum excellens, et iudicium de illo obtinendo, omnia quæ confirmare possunt hoc iudicium, vel extollere bonum apprehensum, poterunt dici causæ spei, quæ cum desiderium quoddam sit: fere eamdem dispositionem requirit, et eamdem motionem cordis efficit, quam alia desideria, et hinc D. Thomas juvenes, quod calore abundant, faciles dicit esse ad sperandum. Secundo solvitur ex dictis dubium, quod Cajetanus movet, quomodo spes possit esse partis sensitivæ actus, cum sit de futuris, quæ sensu non apprehenduntur.

Respondetur enim objectum spei esse præsens in se, vel in aliquo alio, tamen ejus consecutio abest, et hoc modo brutum animal videns pabulum præsens, appetit obtinere illud, et si apprehendat ut arduum, etiam conatur illud consequi: saepè vero ex signo, vel ex effectu movetur brutum ad sperandum aliud, non quia ex cognitione unius in apprehensionem rei futuræ perveniat: nam hic est discursus: sed ex instinctu naturæ, vel consuetudine apprehendit, ut conveniens id quod aliquod commodum allaturum est, quamvis futurum commodum non apprehendat, ut hirundo cum ædificat, sicut tantum habet estimationem de ipsis rebus, quæ sensibus objiciuntur, ita solum appetit et sperat ea quae veluti ante oculos habet: sub ratione tamen futuri magis in actu exercito, quam signato, ut perficere nudum, deferre paleas: vide S. Thomam 1, 2, quæst. 40, art. 3, ad 1, et quæst. 42, art. 1, ad 3.

7. *Tertium corollarium.* — *Quartum corollarium.* — Tertio intelligitur quisnam actus sit desperation, nam S. Thomas et Cajetanus, supra art. 4, volunt desperationem esse motum positivum contrarium spei, id est, recessum materiale ab illo bono ad quod spes ferebatur; quæ sententia sic videtur intelligenda, ut in eo qui desperat, præter desiderii privationem, sit quidam motus appetitus, quo proponit quis desistere a prosecutione talis boni, quod licet secundum se sit conveniens, tamen in ordine ad acquisitionem ejus non existimatur tale, quia consecutio ipsa judicatur impossibilis, et hoc modo desperatione potest esse fuga appetitus, quia licet recedat a bono, non tamen ut bonum est, sed ut impossibile, vel nunquam obtainendum, et sic quamdam rationem habet mali: hoc ergo modo est probabilis ista sententia, siveque intelligendus est S. Thomas, su-

pra, articul. 4, interdum enim ait objectum desperationis esse bonum, interdum esse malum, et utrumque verum est, ut dixi: frequentius tamen dicitur versari circa bonum a quo aliquis quasi difficultate superatus, reddit. Quarto ex dictis constat fere omnes divisiones datas de desiderio et fuga, ac cætera, quæ de illis diximus, proportione servata habere locum in spe et desperatione.

## SECTIO IX.

*Quid sit audacia, et quomodo ad alias passiones comparetur.*

1. *Notatio prima pro decisione questionis.*

— *Notatio secunda.* — Quamvis S. Thomas prius de timore, in 1, 2, a quæst. 41, ad 44, postea de audacia, in q. 43, disseruit, tamen cum timor ad fugam pertineat, et audaciæ contrarius sit, que persecutio quædam est, consequenti methodo, prius videtur de audacia, quam de timore disserendum: ut autem horum actuum rationes intelligentur, advertendum est motum prosecutivum appetitus per se primo ferri in bonum, interdum vero ferri in aliquod malum, quod oportet vel superare, vel perferre, ut quis intentum vere consequatur. Audacia ergo ad eos actus pertinet, quibus anima hujusmodi malorum pericula appetit et aggreditur, quod Scotus, in 3, dist. 23, notavit, addit vero S. Thomas, in quæst. 40, audaciam solum excitari in irascibili, qua bonum quod speratur, superato aliquo gravi malo, vel tentato aliquo probabili periculo, obtainendum est. In quo est advertendum secundo, consecutionem boni duplaci modo existimari posse arduam et difficultem: uno modo, quia est bonum ipsum interdum, et media quibus obtineri debet, per se sunt excellentia et difficultia, et in illis propriæ versatur spes; alio modo censemur consecutio boni ardua et difficultis, quia aliquod malum, quod tolerare, vel superare oportet, aut grave saltem illius periculum, cum illa conjunctum est, et circa hæc propriæ versatur audacia.

2. *Primum assertum audaciæ dari.* — *An audacia versetur circa malum certum.*

— Ex his constat secundo, quomodo intelligendum sit, quod de objecto audaciæ docet D. Thomas 1, 2, q. 95, art. 3, nempe esse aliquod malum imminent, tria enim in objecto possunt considerari. Primum id quod proxime appetitur, nempe opus aliquod, vel medium per se non malum, sed potius consentaneum fini obtinendo. Secundum ratio amandi, quæ est bonum aliquod a quo appetitus excitatur ad aggrediendum. Tertium est aliquid, quod vel permittitur, vel parvi pendit, et hoc potest esse aliquod malum quod appetitus per se non appetit, sed quia illud vitare non potest nisi caret bono amato, illud permittit, et parvi pendit, et quia in hoc ultimo tota difficultas hujus actus consistit, ab illo nomen et rationem accipit, et per illud objectum explicatur. Adendum vero est pro actu illo, quem constantiam quamdam appetitus dicebamus, interdum per hujusmodi actum, non solum permitti malum, quod est in objecto, sed etiam directe appeti, quando ipsum malum, vel incommo-

dum objecti, ut tale est, est utile ad tale bonum: ut cum quis, verbi gratia, appetit pœnitentiam, non solum appetit ipsam actionem, sed etiam malitiam ipsam illius directe appetit, malitiam, inquam, quæ ad peccatum spectat, hic tamen modus appetendi magis ad voluntatem, quam ad appetitum pertinet.

4. *Tertium assertum de quidditate audacie.*  
— Tertio colligitur, audaciæ modum, si ratio ejus formaliter consideretur, re vera in quadam desiderio consistere, nam est prosecutio objecti sub ratione boni futuri, in quo ratio desiderii consistit, quæ omnia ex dictis patent, et in voluntate apertius manifestantur, nam velle aggredi opus, cui est conjunctum periculum mortis propter alium finem consequendum, vel propter honestatem, int̄entio quædam est, vel electio, quæ desideria quædam sunt, ut supra dixi; ergo, etc. Confirmatur, nam appetere hoc objectum, si nulla esset in eo ratio mali, vel periculi, censeretur sine dubio actus desiderii: ergo idem erit quamvis adjungatur illud periculum, nam hoc non variat rationem formalem actus, quia nec mutat formale motivum, nec modum tendendi.

5. *Quartum assertum de causis et effectibus audaciæ.* — Ultimo colligitur ex dictis quas causas, vel effectus habet hæc passio, nam ex ea parte, qua cum desiderio communicat, ejusdem rationis causas habet, nam quidquid desiderium auget, quantum in se est, auget audaciam, et similiter auget estimationem boni: propter quod subeundum est periculum: quia vero audacia versatur in malo, quidquid minuit estimationem mali, vel periculi, audaciam confert et tribuit potestatem, aut robur ab superandum illud malum: et hoc modo dignitiae, vel amicorum auxilia augent audaciam. Unde Aristoteles 2, Ethicor., cap. 5, dixit audatores esse, qui melius se habent ad divina, quia paratiorem Dei protectionem sibi pollicentur, et eos, qui passi sunt injusta eadem ratione audatores esse, quia sperant Dei favorem futurum, præter hæc experientia auget audaciam, quamvis nonnunquam minuat, nam inexperti temere, aggrediantur pericula, experti prudentius, et constantius. Effectus etiam sunt ejusdem rationis cum supradictis de desiderio et spe, commotio cordis et delectatio, etc., quia in hac passione confortatur appetitus ad vincendum malum, calor etiam et spiritus revocantur ad cor, et tunc solent exteriories partes fugere: hinc etiam sanguineus humor et cholericus, spirituumque abundantia conferunt audaciam, et Aristoteles, problemate 4, sect. 27,

dicit habentes magnum pulmonem esse audatores, quia spiritibus et sanguine abundant, et ex eadem radice provenire (inquit) homines vino deditos esse audaces.

## SECTIO X.

*Quid sit timor.*

1. *Quid et quotuplex sit timor.* — Dicendum primo. Timor est affectus in fuga consistens et audaciæ contrarius. Est tamen advertendum ex S. Thoma, 1, 2, quæst. 30, art. 2, ad 3, nomen *timoris* generali quadam ratione significare omnem fugam appetitus a quocumque malo imminentem, quomodo timor etiam opponitur concupiscentiæ, et generaliter desiderio boni opponitur, sub qua generali ratione potest in duas fugas, seu timores distingui, sicut distinguuntur audacia a communi desiderio, quos timores S. Thomas, quæst. 41, in hoc inquit differre, quia timor desiderio contrarius est de futuro malo simpliciter dicto, alius vero est de malo arduo et difficulti ad evitandum: sed contra hoc est, quia, ut supra dixi, arduum et non arduum non videntur distinguere affectiones et appetitus, unde etiam fuga desiderio contraria potest esse de arduo et gravissimo malo, sicut odium.

2. *Quomodo arduum pertineat ad objectum timoris.* — Duo igitur exponenda videntur. Primum, quomodo timor, de quo hic agimus, circa arduum versetur. In quo est advertendum malum dupliciter apprehendi posse, uno modo secundum se sine ordine ad futuritionem, alio modo, ut futurum et imminens, nam si omnino impossibile sit, vel omnino non futurum credatur, non timetur: fieri autem potest, ut malum futurum apprehendatur, ut inevitabile, et tunc etiam non sequitur proprie timor, sed tristitia quædam, quia jam malum illud apprehendit, ut præsens, unde Aristoteles, 2, Rhetor., cap. 5, dixit, eos qui morte jam multandi sunt, non timere, quia mortem inevitabilem fere apprehendunt: est ergo timor de malo quidem, quod apprehenditur, ut futurum, ita tamen, ut evitari possit cum aliqua saltem difficultate, nam si facile vitari potest, proprie non timetur, quia est veluti positum in propria potestate, et quoad hoc saltem verum est timorem esse de malo arduo, quia nimis arduum debet esse illud impedire, ita Aristoteles citatus, et divus Thomas, 1, 2, quæst. 41, art. 2 et 3.

3. *Quibus modis possit appetitus versari circa*

*malum apprehensum ut futurum.* — Secundo, quod impediri non potest: hæc tamen nomina alias habent significations, et pro ut hic expositæ sunt, non species diversas timoris significant, sed fortasse distinctos ejus gradus: solum est cum Cajetano advertendum Aristotelem ad concupiscentiæ potius revocasse admirationem, quæ ex consideratione effectus rari oritur, et concupiscentiam cognoscendi causam occultam parit, unde vel in diversa significacione admiratio hic sumitur: vel utrumque includit timorem ferendi judicium in praesenti, et concupiscentiam cognitionis futuræ: ita S. Thomas, supra, indicat ad 5.

5. *De causis timoris.* — *De effectibus.* — Tertio constat quas causas et effectus timor habeat, quidquid enim confert ad passionem futuri mali auget timorem: amor etiam boni contrarii maxime fovet illum, Augustinus, lib. 83, Quæstionum, quæst. 33, imbecillitas et defectus virtutis efficit timorem, quia periculum existimatur majus, et ideo pueri, et senes et mulieres magis timent, S. Thomas 1, 2, quæst. 43, art. 1. Denique omnia, quæ sunt causis audaciæ contraria, timorem inveniunt. Effectus vero numerari solent. Primus, tristitia quædam contraria illi gaudio, quod de spe boni nascitur: imo sunt, qui in hac tristitia affectum timoris constituant: sed non recte, quia gaudium non est spes ipsa, sed effectus ejus: ergo e contra etiam timor est de malo futuro, ut sic, tristitia vero, vel est de ipso timore, vel de malo apprehenso aliquo modo ut praesenti. Secundus effectus, timore et tristitia contrahitur cor, avocantur spiritus, unde sequitur frigus in externis membris, tremor etiam et pavor, interdum lingue titubatio et ineptitudo operandi, et nonnunquam etiam famæ, Isai. 34: *Confortate manus dissolutas, et genua debilia roborate:* videatur S. Thomas 1, 2, quæst. 44. Sed hæc intelliguntur quando timor nimius est, et superat spem, si enim spes vincat (isti enim effectus saepe miscentur) impedit dictos effectus, et tunc timor juvat ad operandum propter vitandum saltem malum, quod timetur. Aristoteles 2, Rhetor., cap. 5, ad Philippens. 2, *cum timore et tremore*, etc., de his et aliis vide Cajetanum, quæst. 43, qui bene exponit, quomodo interdum ex timore sequatur rubor, aut verecundia.

6. Sed occurunt due difficultates. Prima, quia sequitur ex dictis beatos non posse timere, cum non possint pati malum. Secundo sequitur Christum non fuisse passum affectum timoris, quia certo sciebat non potuisse se fugere mortem. Confirmatur, nam certum judi-